

E Importansia di e Resurekshon

Nos ta gusta e temporada di aña ku nos ta selebrá pasku di nasementu. Tin un ambiente spesial. E storia di e Beibi di Betlehèm ta bunita, presioso, i sentimental.

En kontraste, e susesonan di Kalvario ku nos ta kòrda e siman aki ta mahos, kruel, i penoso: e sota, korona di sumpiña, klabunan, krus, doló, set, i morto. Ma e eventonan ku nos ta kòrda e siman aki huntu ku e susesonan di pasku di resurekshon ta surpasá pasku di nasementu den importansia.

Fundeshi di mayoria religion ta filosófiko. Kristianismo ta basá riba eventonan históriko. Ta bisá ku kristianismo ta e úniko religion ku ta basa su kreensia riba e resurekshon di su fundadó! Muhammad, fundadó di e religion islámiko ta derá na Medina. Probabelmente na morto di Buddha, su kurpa a ser kimá i su wesunan distribuí komo relikwia. Abraham, fundadó di hudaismo, ta derá den kueba di Makpela na Israel.

Ma na Israel tin un otro graf ku miles di hende ta bishitá tur aña. E graf aki, lokalísá den serkania di e serú di Kalvario, ta diferente...e ta bashí. Arkeológonan ta pensa ku esaki ta e probabel sitio unda Hesus a ser derá; un sitio unda ningun wesu por ser haña.

Graf di otro religion ta okupá. Nan lo ni riska bisa ku nan fundadó a resusitá. KRISTIANISMO SO TA DEPENDE POR KOMPLETO DI UN GRAF BASHI! Esun ku por proba ku graf di Hesus ta okupá por destruí kristianismo. (Hopi hende i grupo a purba hasi nèt esei...i tur a fracasá!) Klaramente e resurekshon di Hesus ta un evento di suma importansia!

E resurekshon di Kristu sigur ta resaltá den Beibel. El a ser profetisá den Tèstament Bieu i ta mensioná mas ku shen biaha den Tèstament Nobo. Ma e frekuensia ku e resurekshon ta bin dilanti den Skritura no ta e motibu prinsipal ku e ta importante.

Kristu Su resurekshon ta proba ku E ta Dios! Hesus a deklará, "Mi ta duna Mi bida pa bolbe tum'è...Mi tin poder pa dun'è i poder pa bolbe tum'è.." (Juan 10:17-18). Dios SO tin e poder ei! Hende por entregá nan bida, ma ningun hende por tum'è bek despues di morto. E resurekshon a proba ku Hesus tin e poder ei, i pues ta un otro evidensia ku E ta Dios!

Hesus tambe a deklará abiertamente ku E ta e Yu di Dios (den otro palabra, Dios mes). Imaginá un ratu ku bo ta Dios Tata. Si un gañadó ta kana riba mundu pretendiendo ku e ta e Yu di Dios, deklarando ku E lo resusitá, lo bo lamt'è for di morto despues ku el a muri? Sigur ku nò! Ma Dios Tata a pone Su stèmpel di aprobashon riba Hesus dor di resusit'è! Hesus "a wòrdu mustrá ku poder ku E ta Yu di Dios...(dor di) resurekshon di mortonan" (Romanonan 1:4).

Ademas, e resurekshon a proba ku Hesus a papia bèrdat. Kristu a hasi hopi deklarashon interesante, enfátiko, i asombrante. Un di esnan mas asombrante ta esun ku El a hasi na sikiera kuater okashon distinto...Su profesia ku E lo resusitá despues di muri (Mateo 16:21; 17:9,22-23; 20:17-19). Asta El a duna di konosé unda e eventonan aki lo sosodé i kuantu dia despues di Su morto lo E resusitá. Awendia si un hende lo papia asina, nos lo laga intern'è na Klinika Kapriles. Kualke ken ku ta por BISA ku e lo resusitá; ma ta humanamente impusibel pa HASIE. Ma Hesus tabatin e poder pa hasi presis loke El a bisa! E echu ei ta indiká ku nos por tin tur siguransa ku Su otro palabranan tambe ta bèrdat i lo sosodé presis manera El a bisa!

Para pensa di algun otro deklarashon enfátiko i asombrante ku Hesus a hasi. "Esun ku kere den e Yu tin bida eternu; ma esun ku desobedesé e Yu esei lo no mira e bida, ma e rabia di Dios lo keda riba dje. Esun ku ta tende Mi palabra kere Esun ku a mandáMi, esei tin bida eternu, i no ta bin na kondensashon ma el a pasa fo'i morto (pa) bida. Ami ta e kamina, bèrdat, i bida; ningun ta bini serka e Tata sino pa medio di Mi" (Juan 3:36; 5:24; 14:6)

Esaki ta palabranan di un loko, òf un gañadó, òf Señor Dios. E resurekshon ta proba ku Hesus no tabata un loko òf un gañadó. Esei ta laga un opshon so. Ta keda na nos si nos lo aseptá Su palabranan i aktua conforme ku nan.